


Ini ginadala sa inyo sang
Biblia Para sa mga Bata



Langit, Ang
Matahom
nga Puluy-an
sang Dios



Ginsulat ni: Edward Hughes

Gindrowing ni: Lazarus
Alastair Paterson

Gin-adaptar ni: Sarah S.

Gin-translate ni: Ramon Torres

Ginpahimo sang: Bible for Children
www.M1914.org

©2020 Bible for Children, Inc.

May kinamatarong ka sa pagkopya ukon pag-imprinta sang sini
nga estorya, basta indi lang pag-ibaligya.



Sang diri pa si Jesus sa duta, ginsugiran niya ang iya mga sumulunod parte sa langit. Gintawag niya ini "Puluy-an sang Akon Amay", kag nagsiling siya nga may madamo nga mga kuwarto didto. Mas matahom kag mas masangkad ang langit sang sa bisan ano nga puluy-an diri sa duta.



Nagsiling si Jesus, "Magalakat ako sa pagpreparar sang lugar para sa inyo. Kag kon makalakat na ako kag makapreparar na sang lugar para sa inyo, mabalik ako agod kuhaon ko kamo."



Nagbalik matuod si Jesus sa langit matapos nga nabanhaw siya. Samtang nagatulok ang iya mga sumulunod, gindala si Jesus pa-langit. Ginlibutan siya sang mga panganod kag dayon nadula siya sa ila panulok.



Halin sadto, ginadumdom sang mga Kristiano ang promisa ni Jesus nga magabalik siya kag kuhaon sila. Nagsiling si Jesus nga gulpi lang siya magabalik, sa tion nga wala ginapaabot.

Pero paano ang mga Kristiano nga napatay antes siya magabalik?


Nagasiling ang Biblia nga magakadto sila didto kay

Jesus. Kay kon wala

kita sa sini nga

lawas didto kita

sa presensya
sang Ginoo.




KAUPOD SA
PRESENSYA SANG
GINOO




Ang Pahayag, ang katapusan nga libro sang Biblia, nagasugid sa aton kon daw ano katahom ang langit. Ang pinakamatahom nga butang nga ang langit isa ka espesyal nga puluy-an sang Dios. Ang Dios ara

bisan diin, pero ang iya trono ara sa langit.




Ang mga anghel kag ang iban pa nga langitnon nga mga tinuga nagasimba sa Dios sa langit. Kag amo man ang ginahimo sang mga nagkalamatay na nga ara sa langit. Nagakanta sila sang mga espesyal nga kalantahon sa pagdayaw sa Dios. Ari ang mga pulong sang isa nga ginakanta nila:




TAKOS IKAW SIMBAHON KAY GINTUBOS MO
KAMI AGOD MANGIN IYA SANG DIOS PAAGI
SA IMO DUGO. GINPILI MO
KAMI SA TANAN NGA TRIBO
KAG NASYON, KAG GINHIMO
MO KAMI NGA HARI KAG
MGA PARI SA
PAG-ALAGAD
SA AMON
DIOS.
(Pah. 5:9)



Ang katapusan nga bahin sang Biblia nagahambal nga ang langit amo ang "Bag-o nga Jerusalem". Puwerte ini kadako, nga may mataas nga pader sa palibot. Ang pader ginhimo halin sa bato nga jasper, nga pareho katin-aw sa kristal.



Nahaklapan ang pundasyon sang pader sang malahalón nga mga bato, nga lain-lain ang kolor kag nagabadlak. Ang tagsa ka puwertahan sang siyudad ginhimo halin sa isa ka dako gid nga perlas.




Atong matahom nga mga puwertahan nga perlas
permi bukas. Dali, sulod kita kag tan-awon naton ...
WOW! Mas pwerte pa gid katahom sa sulod sang
langit. Ang siyudad puro bulawan, nga daw pareho


katin-aw sa
kristal. Bisan
ang mga dalan
bulawan
man.




May matahom kag matin-aw nga suba nga nagahatag kabuhi kag nagailig ini halin sa trono sang Dios. Sa pihak kag pihak sang suba may kahoy nga nagahatag sang kabuhi, nga makita sadto sa katamnan sang Eden. Ini nga kahoy espesyal gid. May dose ini ka bunga, kag lain-lain nga bunga kada bulan. Ang mga dahon sini nagahatag sang kaayuhan sa mga nasyon.



Indi kinahanglan sang langit ang adlaw ukon bulan para maghatag kasanag. Ang kasanag mismo sang Dios ang nagahatag sang matahom nga kasanag sa bug-os nga langit. Wala gid sing gab-i didto.



Bisan ang mga sapat sa langit lain na. Maanta sila kag mabuot. Ang mabangis nga ido nagahalab upod sa karnero, amo man ang leon kag ang turo nga baka. Nagsiling ang Ginoo, "Wala na sing may magpanghalit ukon magpangguba sa akon balaan nga bukid."



Samtang nagatan-aw kita sa palibot, makita naton nga may mga butang nga wala sa langit. Wala na sing may mabatian nga masakit nga mga hambalanon.

Wala na sing inaway ukon kadalok.



Wala sang trangka ang mga puwertahan, kay wala sing kawatan sa langit. Wala na sing butigon, manugpatay, babaylan, ukon malaot nga mga tawo.


Wala na gid sing bisan ano nga klase sang sala sa langit.



Kaupod naton ang Dios sa langit
gani wala na sing paghibi. Kon
kaisa nagahibi ang katawhan
sang Dios diri sa duta tungod sa
mga kalisod sa sini nga kabuhi.
Pero sa langit, pahiran sang Dios
ang tanan ta nga luha.




Wala na man sing kamatayon sa langit. Kaupod na sang Dios ang iya katawhan sa wala sing katapusan. Wala na sing kasubo, paghibi, ukon kasakit. Wala na sing balatian, pagbulagay, ukon pagkumpanyar. Ang tanan malipayon sa langit kaupod ang Dios sa wala sing katapusan.



Labaw sa tanan, ang langit para sa mga bata nga lalaki kag babayi (kag sa mga may edad man) nga nagtuo sa kay Jesu-Cristo bilang Manluluwas kag nagsunod sa iya bilang ila Agalon. Sa langit may libro nga ginatawag Libro sang Karnero nga Nagahatag Kabuhi. Puno ini sang ngalan sang mga tawo. Nahibaluan mo bala kon kay sin-o mga ngalan ang nasulat didto? Ang tanan nga nagtuo kay Jesus.

Didto bala ang ngalan mo?



Ang katapusan nga mga pulong sang Biblia parte sa langit isa ka matahom nga imbitasyon. "Nagasiling ang Espiritu kag ang babayi nga kalaslon, 'Dali!' Kag ang tanan nga nagapalamati magsiling man, 'Dali!' Ang bisan sin-o nga ginauhaw magpalapit. Ang gusto

mag-inom,
magbaton
sang

tubig nga
nagahatag
sang kabuhi nga
wala sing bayad."



Langit, Ang Matahom nga Puluy-an sang Dios

Isa ka estorya halin sa Pulong sang Dios,
Ang Biblia,

makita sa

Juan 14; 2 Corinto 5;
Pahayag 4, 21, 22

"Ang pagpahayag sang imo mga pulong
nagahatag sang kasanag." Salmo 119:130



Ang Katapusan



Ang ini nga estorya sa Biblia nagasugid parte sa aton matahom nga Dios nga nagtuga sa aton kag gusto niya nga makilala mo siya.

Nahibaluan sang Dios nga nakahimo kita sang malain nga mga bagay nga ginatawag niya nga sala. Ang bayad sa sala amo ang kamatayon, pero palangga gid ikaw sang Dios gani ginpadala niya ang iya bugtong nga Anak nga si Jesus agod mapatay sa krus. Ginsilutan siya para bayaran ang imo sala. Dayon nabuhi siya liwat kag nagbalik sa langit. Kon nagatuo ka kay Jesus kag ginapangabay mo siya nga patawaran ka sa imo sala, himuon niya ina! Magasulod siya kag magapuyo sa imo subong, kag magakabuhi ka kaupod niya sa wala sing katapusan.

Kon nagapati ka sa sini nga kamatuoran, ihambal ini sa Dios: Mahal nga Jesus, nagatuo ako nga Dios ikaw, kag nangin tawo agod mapatay para sa akon mga sala, kag subong buhi ikaw. Magsulod ka sa akon kabuhi kag patawara ang akon mga sala, agod may bag-o na ako nga kabuhi, kag sa pila ka adlaw magaupod ako sa imo sa wala sing katapusan.

Basaha ang Biblia kag estoryaha ang Dios adlaw-adlaw! Juan 3:16

